

6 6
no. 13
HISTOIRE

ADMIRABLE A LA
POSTERITE DES FAITS
ET GESTES DE HENRY
de Valois.

*Comparez en tous poinets avec ceux de
Loys Faineant : & la miserable fin
de l'un & de l'autre.*

Avec vn nouveau & fatal Anagramme du
nom dudit Henry de Valois.



A PARIS,
Chez Pierre des-Hayes demurant en la rue du
bon Puy à l'Escuice.

1589.
Avec permission.

1900

1870

THE GAZETTE OF INDIA

1874

1871

1900



HISTOIRE DES FAICTS

ET GESTES DE HENRY DE

Valois , avec ceux de Loys le

Faineant: & la miserable fin

de l'un & de l'autre.



Ntre les autres profits que l'histoire nous apporte, celui est à mon iugement le plus grád qu'elle nous met deuant les yeux: les vertus de nos predecesseurs , afin que nous les imitions, & aussi elle nous propose les vices de nos deuanciers,

A ij

afin que nous les eussions, quoy
 faisans il est impossible que nous
 ne reglions bien & heureusement
 le cours de nostre vie, Nam (ut ait qui-
dam sapiens) *vita aliena nobis est magistra, &*
qui ignarus est præteritorum, quasi cecus in fu-
turorum prorumpit euentus. Mais si la le-
 cture des histoires est necessaire à
 quelqu'un, certes c'est aux Princes
 & aux Rois. Qui est la cause que ce
 grand philosophe Demetrie, Pha-
 leree, exhortoit & admonnestoit ja-
 dis Philippe Roy de Macedoine
 qu'il leust & feuilletast les Histo-
 res, & autres liures des bons & sca-
 uants Escriuains: d'autant (disoit il)
 que ceux qui sont à l'entour des
 Rois n'osent bien souuent leur
 dire la verité des choses, mais les
 Histoires & les liures leur parlent
 librement & manifestement. Si

Héry de Valois dernier mort, eust
suiuy le conseil de ce philosophe,
& se fust quelque peu arresté à
l'histoire de ses predecesseurs Rois
de France, il me fust tombé es mi-
seres lesquelles ses meschancetez
l'ont plongé, & n'eust semblable-
ment ruiné la France, & destruit
son peuple, qui pour le iourd'huy
est miserable. Mais ayāt tous iours
mesprisé & les vertuz & les bōnes
lettres, il a suiuy ses affections de-
sordonnees & desraisonnables, &
en fin s'est perdu, & a miserable-
ment renuersé & effacé le bō heur
de son royaume, & au lieu qu'il de-
uoit craindre & euitier de cheoir au
blaspheme, & en l'ignomine en la-
quelle iadis tōba Loys le Fayneant,
vingt neuuiesme Roy de France,
semble qu'il s'est pleu à retracer les

pas d'iceluy, & a non seulement imité, mais voire a surpasser la lubricité, & faineantise d'iceluy, cōme il nous appert, & est manifeste à vn chacun si nous voulons conferer les gestes de l'vn, avec ceux de l'autre: que feray brefuement à fin que tout le peuple François à qui ie dedie amiablement & charitablement ce discours voye les admirables effects de l'immense sagesse & prouidence de Dieu, qui en les conseils est infinie & inscriptable.

Article. 1.

L'histoire Françoisse nous tesmoigne que Loys le Fayneant 29. Roy de france fut fils de Karlo-man, Roy certes vaillant & genereux, comme il appert des guerres qu'il mena fort heureusement cō-

tre les Normans qui estoient en Flandres & à Gand, & cōtre Boson & Charles Empereur de Rome, qu'il desconfit à Vienne en Daulphiné, & fut seulement denigré à cause qu'il estoit bastard de Loys le balbe ou begue. Neátmoins Loys le Fayneant forligna du tout de la magnanimité de son pere, comme ie diray tãtost, & ne luy ressemble en rien. Ainsi scauons que Henry de Valois dernier mort a esté estimé fils de Henry second, Roy de France, lequel a iustement & prosperément regné en France: bien est vray que plusieurs voyãs qu'il deflechissoit totalement de la vertu dudiçt Henry second, ont doubté s'il estoit legitime, osans quelques vns prescher publiquement, escrire, & asseurer que nō, de sorte que

comme Loys le Fayneant estoit venu de bastardise, tout ainsi Henry troisieme en estoit malheureusement issu, selon l'opiniõ de ceux que i'ay cy dessus mentionnez.

Article 2.

Loys le Faineaut fut ainsi surnommé à cause de sa negligence, & peu d'efficace és affaires de son royaume, qui est la cause que tous les hommes sages et prudens voyans la nonchallance de laquelle Henry de Valois dernier a vsé au gouvernement & reiglement des trois Estats de France, l'ont appelé tantost Faineant, tantost Jean de Paris, tãtost Hermite, et d'autres semblables noms significatifs de sa paresseuse nonchallance.

Article 3.

Loys le Faineant fut du tout adonné

donné à lubricité, paillardise & luxure, tellement qu'il espousa vne nonnain, laquelle il tira de l'Abbaie de Chelles pres Paris, qui est (comme remarque l'histoire de France) l'un des grands pechez qu'homme peust faire, & abominable à Dieu & aux homes. Or la paillardise, lubricité et luxure de Henry de Valois dernier, est si notoire à vn chacun, qu'il ne faut pas beaucoup me peiner de la prouuer d'auantage, veu que lon sçait comme il viola vne religieuse dans l'Abbaye de Poissi, surmontant en cela l'impiété de Loys le Fayneant, car Loys le Faineant espousa la nonnain de Chelles, palliant son forfait du voile de mariage: Mais Henry de Valois dernier, aiant vne tres-honeste et tres-vertueuse femme, roi-

ne de Frāce, ne se cōtentans d'elle,
et mespriant non seulement la re-
uerence deüe au Sacrement de ma-
riage, mais aussi aux vierges dediees
à Dieu, a ose abuser de la religieuse
de Poissi, et de plusieurs autres fil-
les de maison offensant & renuer-
sant la loy de son predecesseur Io-
uinian Empereur, lequel iadis cō-
manda ainsi, Si quelqu'un ose ie ne
diray pas rair, mais tant soit peu
solliciter les vierges vouees à Dieu
pour contracter mariage avecques
elles, qu'il soit par glaiue mis à
mort, ceste loy est exemple au pre-
mier liure du Code de l'Empereur.
Et ne faut qu'aucun m'obiecte que
les Rois ne sōt subiets aux loix, car
cela est faulx, mesmes par la con-
fession des bons Empereurs Theo-
dose & Valentinian, lesquels au

premier liure du Code, au tiltre *De legibus* parlent ainfi, C'est vne voix digne de la maieſté d'un Roy, & de tout autre Prince de ſe dire lié & aſtrains aux loix, car noſtre auctorité deſcéd de l'autorité des loix, & certes ſoubmettre l'Empire & principauté aux loix, eſt choſe plus grande et plus excellēte que l'Empire, & principauté meſme. Les liures du droit Romain, & des conſtitutions des anciens Empereurs ſont pleins de telles ſentences & ordonnances, lesquelles ie laiſſe à cauſe de briueuté, par lesquelles il appert que tous Rois ſont obligez à garder les loix, & ceux qui leur donnent autrement à entendre, les perdent, & quand & quād ruinent les peuples, & les royaumes.

Article 4.

Loys le Faincant pour entretenir ses paillardises & voluptez défordonnees , fit des grandes inaccoustumees , & intolerables exactions sur les subiets du royaume. Chacun scait quels impôts , quelles daces , & quelles exactions ont esté faictes par Henry de Valois dernier , tant sur l'Eglise , que sur tous les autres estats de Frâce , pour fournir argent à ses mignons , & à ses autres plaisirs si esloignez de raison & de nature , qu'on ne les doit pas seulement nommer. Et au lieu que les Rois & Empereurs anciens ont condamné à mort & à bannissement les inuenteurs & auteurs de nouueaux tributs , impôts , & exactions , comme il ap-

pert par la loy premiere, où il est dit, Celuy aussi qui aura inuenté vn nouveau tribut, sera puny selon ceste loy. (Je laisse les autres passages & loix contenus tant aux Pandectes que au Code de Iustinian, ou le mesme est souuent ramentu.) Henry de Valois dernier acheri, aimé & recherché ceux qui de iour en iour luy môstroient nouueaux moyés de tirer argent de ses subiets, ne se contentant d'auoir la laine de son peuple, ains voulant l'escorcher totalement, qui est cōtre le cōseil de l'Empereur Tibere, qui disoit, C'est le deuoir d'un bon pasteur de tondre son troupeau, mais non pas de l'escorcher.

Article 5.

Loys le Faineants'est tousiours

B iij

gouverné par le conseil des ieunes qui estoient avec luy, lesquels en fin l'amenerent à ruine comme nous dirons apres. Tout ainsi Henry de Valois dernier a tousiours chassé loing de soy les hommes prudens, aagez, doctes, & experimentez, & s'est accosté de ieunes ignorants, & alterez du bien d'autrui, qui finalement l'ont perdu.

Article 6.

Loys le Faineant rendit la France tributaire aux Normans de douze mille liures d'argent iusques à douze ans, ne plus ne moins Héry de Valois dernier a rendu la Frâce tributaire aux Allemands, ausquels il donna plusieurs terres, & Seigneuries, tant au Duché de Borgogne, que ailleurs. lon sçait aussi de

combien il a renduë la couronne
de France redeuable aux Venitiës,
qui est chose tres-indigne & tres-
inique & ignomineuse aux Fran-
çois.

Article 7.

Loys le Faineant combien qu'il
eut grande puissance d'hômes que
son pere auoit assemblez pour fai-
re guerre aux Normans, n'en vou-
lut rien faire, ains contracta la paix
auecques eux : ainsi Henry de Va-
lois dernier, ayant assez de force &
puissance pour vaincre les Here-
tiques (fil eut suiuy le conseil &
cómencement de son frere le Roy
Charles neufiesme) n'en a iamais
rië voulu faire, ains les a tousiours
supportez & entretenus en son
royaume, comme lon a veu iuf-

ques à sa mort.

Article 8.

Loys le Fayneant à cause de sa lascheté, pusillanimité & meschante vie fut déposé par les Francois, qui le mirent hors du regne (ainsi parle l'histoire Francoise) & le feirent tondre moyne à saint Denis, & en son lieu couronnerent pour Roy de France Charles Empereur de Rome, fils de Loys Roy de Germanie, & nepueu de Charles le Chauue. Mais les François de ce temps, & de cest nostre aage, n'ot pas imité la vertu, generosité & hardiesse de leurs predecesseurs, ie dis de ceux qui estoiet du regne de Loys le fayneant, & qui l'expulseret du throsne & regne duquel il estoit indigne: car les François de
ce

ce temps, qui ont veu, & voire à
 leur dam senti, & souffert l'iniqui-
 té, meschanceté, rapine, & impie-
 te de Henry de Valois dernier, ne
 l'ôt pas osé deietter de son trosne,
 luy oster son sceptre, & le faire
 moyne, ains luy ont tousiours o-
 bey à cause que les plus grands, tât
 de l'Eglise, que de la Noblesse, &
 Iustice du royaume de France l'ôt
 tousiours supporté, d'autant qu'ils
 participoient aux rapines & exa-
 ctions d'iceluy: mais le bon Dieu
 qui en fin a voulu deliurer tout le
 peuple François, & spécialement
 les Parisiens de la cruauté & perf-
 die de ce malheureux tyran, l'a fait
 mourir par la main de Iaques Cle-
 ment & miraculeusemēt l'a guidé
 à vn acte si genereux, & à vn faict si

magnanime. Or ie voudrois que les Politiques qui disēt qu'il n'appartient au peuple de punir les Rois, me monstrassent pourquoy les anciens François, ont de leur autorité deposeé, & faict moine Loys le Faynéant, Roy de France, car ils ne troueront que iceux François ayent esté repris ou du Pape, ou d'autre Monarque d'auoir chassé & encloistré le Faynéant. Si donc les François de ce temps eussent faict autant de Henry de Valois, il ya dix ans & pl⁹, le royaume n'eust pas esté destruit cōme il est à present, bien est il vray que quelques zelateurs & desireurs de la conseruation du royaume auoient bien mis en auant qu'il falloĩt deposer ledict Henry de Valois, dernier

mort, et le raser et faire moine, comme il appert par ce distique qui des long tēps a couru entre les doctes, faict sur les trois couronnes que le dict Henry portoit pour sa deuise,

*Quæ dedit ante duas, vnā abstulit, altera
nutat,*

Tertia tonsoris mox faciendā manu.

C'est à dire,

Celuy qui sur ce Roy a mis double couronne,

Luy a ia l'vne ostee, & l'autre va tomber,

Le barbier luy fera, s'il ne doit succomber

La tierce de ce poil que sa teste enuironne.

Et certes il semble que fatalement il eut pris ces trois couronnes pour sa deuise, pour monstrier la perte de trois royaumes qu'il a faite par sa meschanceté, à sçauoir de celuy de Pologne, de France, et (peut estre) des cieux: Qui est la cause que

confidetant vn iour le nom d'ice-
luy, ie les retournay en ceste sorte,

HENRRY DE VALOIS.

Anagramme.

HA RVINE' LE LIS D'OR,

Qui est vn certain presage & eui-
dent tesmoignage qu'il estoit né
pour gaster le royaume de France.

FIN.

SONNET A V PEUPLE

FRANCOIS.

L Ecteur contemple icy le rapport admirable
 De deux Roys Fayneants qui tous deux ont esté
 Honnorez des François, ayans la maiesté,
 Et le sceptre royal, à chacun venerable
 Mais leur lubricité, & vice detestable
 Les a en fin tous deux hors leur throsne iettez
 Et ne leur a seruy leurs malheurs proiettez
 Par qui rendre ils vouloient le peuple miserable.
 Car Dieu qui fait regner cy bas en tous endroicts
 Les Empereurs, les Ducs, les Princes, & les Rois
 Les desceptre bien tost, quand au mal ils s'adonnent.
 De ce tesmoins seront Loys le Fayneant,
 Et Henry de Valois, execrable tyrant,
 Qui de leur faits malins ores ne nous estonnent.

Ceste Histoire a esté veüe &
leüe par messieurs de la sain-
cte Vnion.

Life of King Henry the Fifth
in the year of his death
1422

